

25 AUG 1997

Abu - Anwar

JANGAN TERPENGARUH DENGAN FITNAH, KATA MB

SHAH ALAM, 25 Ogos (Bernama) -- Menteri Besar Selangor Datuk Abu Hassan Omar menggesa rakyat supaya tidak terpengaruh dengan fitnah yang boleh memecahbelahkan kepemimpinan negara dan perpaduan masyarakat.

Katanya penyebaran surat layang yang mentohmah Timbalan Perdana Menteri, Datuk Seri Anwar Ibrahim, adalah satu tindakan yang tidak bertanggungjawab dan mempunyai sifat hasad dengki.

"Saya setuju dengan apa yang dikatakan oleh Perdana Menteri Dr Mahathir Mohamad bahawa surat itu ditulis oleh pihak yang mahu sabotaj dan menjatuhkan imej Timbalan Perdana Menteri," katanya ketika ditemui selepas pelancaran Hari Wanita 1997 di Dewan Jubli Perak, Bangunan Sultan Salahudin Abdul Aziz Shah hari ini.

Terdahulu dalam ucapannya, Abu Hassan berkata kerajaan Selangor sentiasa berusaha memaju serta membangunkan potensi wanita di negeri itu di samping memelihara martabat dan maruah mereka.

"Hal ini menjadi lebih penting memandangkan hampir separuh daripada 2.9 juta penduduk Selangor terdiri daripada kaum wanita, iaitu 1.471 juta," katanya.

Abu Hassan berkata pentadbiran Negeri Selangor di bawah pimpinannya akan menjadikan pembangunan wanita sebagai agenda terpenting dan beliau telah meletak seorang wanita sebagai anggota exco khusus bertanggungjawab mengenai hak ehwal wanita. -- BERNAMA

AZH